

秀山縣志卷十一

士女志第八之三

高義傳 魯學輿 向文元

列女傳 劉郭氏 尹熊氏 附王黃氏

卷十一

士女志

魯學輿傳

魯學輿字肩仁先世江西新城人祖詠唐乾隆癸未進士分四川尋知酉陽州事循聲藉藉擢升潼川知府所至以清白自勵不受一錢父炳閑以軍功保布經歷學輿性純篤年二十三經卽能成誦有神童之目雖宦家子貧難自給嘉慶間攜眷入蜀至縣南青龍垵愛其山水特秀遂築室山麓而居焉時縣境初闢附棚重慶應試頗以爲苦學輿自度寒窘不能遠道求名以醫可活人乃研究靈素市藥於室貧者兼施其藥後游學成都保甯守聘閱試卷有以金求榜首者學輿毅然拒之咸豐初黔寇犯境學輿避亂貴梅溪夜半忽扣門聲急詢之乃延醫也學輿立命背負前往或勸之曰君年近七旬兵馬縱橫山路崎

嶮俟天明而往可乎學輿曰病者安能延垂危之命以待醫耶兵燹後時疫流行死亡枕藉病之家親朋罕至懼傳染也學輿施藥診病終日無倦容亦無厭棄意全活甚眾勿論貧富不言謝資間有謝者一無所受每於歲暮見貧乏者量爲資給錢盡遂杜門不出蓋不忍覩窮人之往來也年七十四卒子侯傳貴州古州同知署八寨廳事孫其昭廣東海豐知縣贊曰高風落落濟困卹鄰里無天札博愛謂仁暮夜却金慎獨自嫌出水芙蓉污泥不染

向文元列傳

向文元字魁先先世由湖南黔陽徙家至縣父廷貴以軍功保外委歸標綏甯署平茶平塊等汛旋任石隄所在自耐清苦不受一錢時苗亂初平野多盜賊廷貴常冒雨雪短衣徒步黑夜巡邏民賴以安鄉人或因睚眦小忿就汛呈訴廷貴委曲化導無不折服民歌頌之文元爲人忠厚樸直家故貧儉約自守未嘗出一失德語取一非義財粵商某貿易至縣相與友善咸豐五年黔匪之亂縣民四出走匿粵商勿遽歸里因兵馬縱橫恐遭劫掠將貨箱寄交文元去後十餘年聞粵商已故不知其家之所在文元置酒集鄉鄰謂之曰吾年已老不願留未了事於沒後也乃出箱驗視原封宛然點物評價售錢近百千延僧道

卷十一

士女志

三

爲商齋薦事畢經眾會計毫無所染家有喜慶宴客見某嫗自房中出及入視客之衣物多有遺失文元悉賠償戒勿宣揚恐此嫗無以自容也妻胡氏以賢孝聞外舅姑貧而無子文元迎養至家執子壻禮甚恭四十餘年無間言及沒喪葬盡禮鄉父老常歎美之

贊曰翻雲覆雨交道日殊臨財勿苟生死不渝窮而益堅高懷矯矯耿介孤標超然雲表

尹熊氏傳 附王黃氏

尹熊氏孔章妻也孔章自有傳氏孝慈聰慧勤慎多惠義初孔章貧氏共勤苦絲是起家事舅姑敬養不輟孔章早故氏曲盡婦職尹氏自顯芝好施凡有義舉氏與夫力爲贊助及顯芝相繼卒里黨援爲成規求者日集氏縱窘無弗取給光緒庚寅秋收時氏發穀數十石察族鄰窘迫之戶酌其人口多寡命僕分送以濟之秀地多山農人植番薯代穀可半載而蓄種甚艱每值種價昂貴無力買種者常曠其業氏購薯苗及瓜菜之屬予人栽種鄉人德之咸同間邑多兵燹氏與里人避亂山谷中倉卒出奔多有啼飢號寒者氏推解不稍吝嗇光緒九年歲荒氏出穀研米入市暗平其價復以錢數百緡市米買貴售賤本資

卷十一

士女志

四

盡亡富家皆感而爭糴歲因以無恐有貧家子盜人衣物爲事主所執將送官究治氏令人暗解其縛縱之使去告事主曰所失幾何使人負盜名子孫蒙垢汝勿播揚吾償汝值焉邑東有二溪爲入楚要津行旅常病涉里人李瑞芝請成輿梁氏捐二百緡助成之鄉人名其橋曰福壽并勒石以頌氏爲人雖疏者必厚待人有急難必設計拯之如有隱惡則諱而私教之若施藥物修道路急無以應或典釵相濟親族中有遺孤難撫者氏畜育之爲之婚配因有眾母之目以所生子殿颺出嗣夫弟榮傑翰颺出嗣榮俊承其宗祧年六十七卒

王黃氏宿儒明政之次女知文字明大節年十九適教諭王炳宗生二子未幾夫病疹黃氏侍藥捧粥朝夕無倦容越半載夫

故氏撫棺悲啼絕飲食者七日因析爨後家計艱難氏躬親井
杵藉紡織謀生子長無力延師爰就鄉塾課讀散學歸必親溫
書籍寒宵燈火常唧唧也子有過失輒痛哭靈前必令子自陳
悔過而後已性好施濟已雖貧乏見人有急難或典釵裙與之
無吝惜意力不能償者亦置焉若忘年四十七卒鄉鄰受其惠
者常哀歎焉

贊曰孝友睦婣振乏繼絕散盡黃金閨中之傑黃氏施惠耿然
守貞蘭芬自潔冰性同清

劉郭氏傳

劉郭氏遼架人朝覲妻也郭氏讀書知文字以有德容家人皆敬愛之翁光宗及朝覲爲右營稿書朝覲自省請餉歸雙日忽警動作需人氏朝夕服役無倦容咸豐五年黔寇犯境時承平日久民不知兵聞者皆股慄團勇望風披靡鄉民見賊卽跪地哀懇聽其殘殺莫敢仰視城中聞警居民相率出奔哭聲震地全城幾空光宗謂郭氏曰吾在營食糧義以死守汝夫病瞽不能行汝速出避賊氏曰死則同死不能棄翁夫以求生也五月十六城陷賊自南門入光宗死之氏扶瞽夫出城里許與賊遇見氏甚美欲掠之令棄其夫氏抱持不放遂殺朝覲氏大哭罵賊賊曰死者已死哭之何益能從我吾不害汝曳氏同行氏奪賊佩刀橫刺賊以手格之中股賊怒遂殺之賊退十餘日鄉人始獲其尸炎天烈日面猶如生氏年甫二十餘同治元年呈請旌表

贊曰敬以相夫貞心彌苦舍生取義一節千古皎皎素雪鬱鬱蒼松不撓不屈正氣所鍾